

# Luxldaexr Sul

## Gurlir Azo Biar

Gurlir eil ddei mel sodu koxl xilmeir leil Yirsaexllixl su ca mel halae zzirmar nr zza seir, cirza-hanga guaxr su vaervaerpor ar mel zza. Nael halleix mel, ca mel zoxlzoxl a Arbosobo ddei ddar nr no, yel yarzi luaxl. Yoxrdaxl mermi dax naer dae Moxrya mermi ar ddei zza. Niul gurlir ddei gga biar dae zoxlyoxl ssormaer eil ddei leil mel Luxldaexr mi. Yar mel dder eilmaex gga su a. Nael yar armael ddei mermi nr hher, armael ddei seirpormar dax nr hher, cirza lei nr zza yar yoxrmo ddei dax mae dae a Yirsaexllixl su ddei Arbosobo leil koxl jjixr lei. Arbosobo yoxl yar leil arsae lerler perniar, arsae goxr seir lol eine biar arddeir a.

Nael Yirsaexllixl su mel eine bei zza wo, bir dae a bbeix capor nei ssor lei si ho arddeirnga a mel, armael ddei jiacuxr gga ca mel mi fel vae xixl mibbe, gol dae seir ca mel leil guaxr mibbe, halae si ho ca hal ddei ddei maerssor leil bbeix nia. Yel aniu xiu beil ddei mel dder si ho ca hal ddei ddei aniu suax nia, aniu eil ddox lar mi vae xixl lei eil fel leil paxr wo ddo. Eine saelnei ca si ho mel leil holcir dae var. Nael ca cirmelmel a vae nr yuex.

Gurlir eil ddei mel niul leil ca mel zzicarzzi leil arsae perniar nia, Arbosobo yoxl niul ca leil arsae perniar bbeix gger. Eil zzu maelmaerjjia mel dder bbeix ni arddol su ca, ni arddolyox ca zzorbbeixlei, Arbosobo ni leil perniar, yar ni leil cirza-hanga seir lol var.

## Yirlixlmirlexl Hhexr Moxrya Mermi Ba Mal

**1** <sup>1</sup> Vaervaerpor mel Yoxrdaxl mermi leil guaxr halleix, halmaex mel loxlmoxr se wo nr ddo, zzorlabox nr zza. Yel halmaex gga Yoxrdaxl mermi Boxrlixlhhexr kax gga ca ar ddei a yar maerssor nei ssor nnel leil hier dae a Moxrya mermi hher ssi. <sup>2</sup> Ca eil ddei leil mel Yirlixlmirlexl mi, yar maerssor leil nael Naxr'exrmi mi. Ssor

nrnel leil mel cir ddei a nael Marluixr mi, cir ddei a nael Zilir mi. Yaa mel Yoxrdaxl mermi Boxrlixlhexr kax gga Yirfarta hhexr ca a. Yaa Moxrya mermi ssi ci a, halmaex gga goxr dae. <sup>3</sup> Giedae mel, Naxr'exrmir capor Yirlixlmirlexl si a. Yel yaa so mollor a goxr dae a. <sup>4</sup> Yar ssor nrnel dder Moxrya mermi ssormaer nrnel bbeix a, yaa maerssor bei lol a; cir ddei a nael Eraerba mi, cir ddei a nael Luxldaexr mi. Yel yaa halmaex ceicei koxl sael hher a. <sup>5</sup> Yar ssor Marluixr nei Zilir yaa nr hieni lei si a. Naxr'exrmir dder capor lei nr zza, ssor lei nr zza, cix zildu a.

### Naxr'exrmir Nei Luxldaexr Boxrlixlhexr Jjixr

<sup>6</sup> Naxr'exrmir halae Moxrya hher dae seir car bbejjiur a bbeix, Yirsaexllixl su ca mel ddei Arbosobo Yihexrhuaxr<sup>a</sup> yaa leil perniar, yaa leil loxlmoxr cirke se wo lol. <sup>7</sup> Yel yar nei yar cirmu nrnel dder Moxrya mermi nr hher a, yaa Yoxrdaxl mermi jjixr a. <sup>8</sup> Jjiumo car gga Naxr'exrmir yar cirmu nrnel leil bbeix: “Nia armael ama dax jjixr ddo a. Yihexrhuaxr nia leil zabbar perniar lol, nia ngo leil perniar nei ngo ddei ssor si ho hal nrnel leil perniar sael a perniar lol nia. <sup>9</sup> Yihexrhuaxr nia leil zeixleixr capor zo wo lol, zabbar goxr seir ake ar ddei zza lol nia.”

Giedae Naxr'exrmir yar cirmu nrnel leil arleixr jiuxl a, yaa dder bbialil-bbialor nge du lei a. <sup>10</sup> Yaa Naxr'exrmir leil bbeix: “Nr ssa, ngua ni dax mae dae a ni mermi halmaex gga jjixr nia.”

<sup>11</sup> Yel Naxr'exrmir yaa leil bbeix: “Allor, nia jjixr ddo a! Nia ngo dax mae dae a azo bei bbeixleir? Ngo zeixleixr capor zo a aniux xiu a, nia capor bei cexr cexr seir? <sup>12</sup> Allor, ngo mar ho a capor zo nr cexr a. Bir dae a bbeix, ngo eilmei capor zo wo a ngo zeixleixr aniux xiu var zzorbbeixlei, <sup>13</sup> nia yaa leil vaervaer loxr xia ci ddo ddo? Nia si leil fu nr gger bei ci ddo ddo? Yihexrhuaxr ngo leil goxr sol lol mel, nia goxr teixl lei nr xie. Nia jjixr lalssa.”

<sup>14</sup> Yaa yoxl nge du lei a. Eraerba nael yar yoxrmo leil arleixr jiuxl a dder yarma hhexr dax jjixr a. Luxldaexr nael jjixr nr vixr, yar yoxr-

---

<sup>a</sup>1:6 Yihexrhuaxr Arbosobo leil Yihexrhuaxr mi.

mo leil zilzir gga gex doxr dae. <sup>15</sup> Yar yoxrmo yar leil bbeix: “Allor, ni noni dae la, nialor yar mermi ca mel dax nei yaa seirpormar dax jjixr a. Ni lei jjixr ddo a.”

<sup>16</sup> Nael Luxldaexr bbeix: “Ngo leil ni dax tor bbe kae lol, ngo leil ni dax mae dae lol la. Ni arddol ssi ci mel, ngo lei arddol ssi ci; ni arddolmaex goxr mel, ngo lei arddolmaex goxr; ni ddei mermi mel dder ngo ddei mermi, ni ddei Arbosobo mel dder ngo ddei Arbosobo a; <sup>17</sup> ni arddolmaex si mel ngo lei arddolmaex si, arddolmaex giexlhex. Si ddei leil cuxrteixl a mel, niul leil bbe kae nr ddo. Ngo, ngo bbeix dae mel sael a nr bei arddeirnga a mel, Yihexrhuaxr ngo leil faxr lol ddo.”

<sup>18</sup> Naxr'exrmir arsaе bbeix lei Luxldaexr yar dax mae lalinga mia a, yel dder zeixleixr yar leil jjixr nia nr bbeix a.

<sup>19</sup> Giedae yaa nr mollor yoxl ssi dae a Boxrlxlhexr kax gga ssi. Yaa ssi ci car, kax gga ca mel lei yarzi murgur, ssormaer maelmaerjia ae dae a bbeix: “Yil! Yar yarzi Naxr'exrmir a zzar?”

<sup>20</sup> Yel Naxr'exrmir bbeix: “Nia ngo leil Naxr'exrmir tor nr ae hor, cirza-hanga lei ddo zzir Arbosobo ngo leil goxr sol lol a, nia ngo leil Marla ae lalssa a.<sup>b</sup> <sup>21</sup> Ngo ddux car mel, cirza-hanga lei zza, jjixr lei a ngo azo lei ar ddei nr zza. Yihexrhuaxr ngo leil faxr, cirza-hanga lei ddo zzir Arbosobo ngo leil goxr sol lol a mel, nia halae arsaenga a ngo leil Naxr'exrmir ae leir?”

<sup>22</sup> Naxr'exrmir nei yar cirmu Moxrya su Luxldaexr yaa nr mollor Moxrya mermi cirdae a Boxrlxlhexr kax gga jjixr ci car mel, jiajia ssu caer du a nga seir.

### Luxldaexr Bo'asi Ddei Mi Gga Ssune Ggux

**2** <sup>1</sup> Naxr'exrmir mel cirssor ar ddei zza, yar leil Bo'asi mi. Yar mel be lei be, mi lei ddux. Yar Naxr'exrmir capor Yirlxlmirlexl ddei cirssor a. <sup>2</sup> Eine ar ni a, Moxrya su Luxldaexr yar yoxrmo leil bbeix: “Ngo leil si mi gga ssu ne ggux ssi lol la. Ngo, ngo leil seir su ca ar ddei pex dae var piar a.”

<sup>b</sup>1:20 Naxr'exrmir ddei yilsi mel dder ggese; Marla ddei yilsi mel dder miexr cer.

Yel yar yoxrmo bbeix: “Allor, ni ssi lar,” eine bbeix a. <sup>3</sup> Yar dder si mi gga ssu caer su mel giedae ssu ne ggux mae dae a; yar ggux dae mi eil bbae malmal mel Yirlixlmirlexl ddei cirssor Bo'asi ddei a.

<sup>4</sup> Hormo arleixr nr nga seir, Bo'asi mel Boxrlixlhexr kax maelleil mi gga lei a. Yar yar leil ssu caer gger su ca mel leil bbeix: “Yihexrhuaxr leil nia dax hher dax dae lol nia.”

Ca mel yar leil ddarkoxl a bbeix: “Yihexrhuaxr ni leil lei seir lol nia.”

<sup>5</sup> Bo'asi ssu caer su ca mel leil guaxr su ddei leil biex a bbeix: “Ssormaer hal ddox arseir hhexr ca a?”

<sup>6</sup> Ca hal mel ddarkoxl a bbeix: “Ssormaer hal ddox mel Naxr'exr-mir Moxrya mermi hier xixl lei ddox nga a. <sup>7</sup> Yar ngo dax bbeix, yar leil ssu caer su mel giedae ssu ne ggux mae lol la. Yel yar eilsene cirdae ggux a eilcar sael arleixr wornol goxr seir, halbbaer xigex ddei gga wornol dae.”

<sup>8</sup> Bo'asi dder Luxldaexr dax ddar te lei a bbeix: “Allor, ni noni dae la. Ni si mi gga ggux ssi nr ssa, ni ngo ddei wormusu ssormaer mel dax ggux mae dae lalssa. <sup>9</sup> Capor mel arddol caer ci nael ni lei ssormaer mel dax mae dae a arddol ggux ci. Ngo capor mel leil bbeix gger ho a: ni leil ci nr ddo, ajjix sixl arddeirnga a nael, ni yaa ajjix larggu gga kexl ji dae ajjix mel dda ssi.”

<sup>10</sup> Yel yar dder Bo'asi leil cizixl gger dae a bbeix: “Ni arsaenga a ngo kebal mermi su ssormaer eil ddei leil eine seir leir?”

<sup>11</sup> Bo'asi ddarkoxl a bbeix: “Ni capor si ho a, ni ni yoxrmo leil arsae perniar mel ngo bbejjiur a. Ni niabor niama dax nei ni mermi lei nr hher, ni nr saexl ca mel dax cirgo a goxr dae mel, maelmaerjjia ngo lei saexl a. <sup>12</sup> Ni yarzi seir eine bei a, Yirsaexllixl su ca mel ddei Arbosobo Yihexrhuaxr ni leil seir lol nia. Ni yar dax pahher dae a mel hherdder yixssor mel yixmodo ddoleixr woxrke pahher dae sael a nga. Gexr ddu nr zza. Yar ni leil zabbar-seilseir a guaxr lol nia.”

<sup>13</sup> Luxldaexr ddarkoxl a bbeix: “Arbbormar, ni ngo leil yarzi seir, ngo ni ddei wormusu ssormaer mel zzi lei nr zza bbeixarnar, ni haelae ddar norlixlix bbeix a ngo leil nixmox zzaso lol.”

<sup>14</sup> Giedae zzo zzor zi ci a, Bo'asi Luxldaexr leil bbeix: “Ni gger lei a, aba ardoxr zzor, puxrto bei teixl lei zeibialbial eilmel xiel lel.” Yel Luxldaexr dder ssu caer su mel dax cirgo a cux dae a zzor. Bo'asi yar leil kal teixl lei yarne ar mel gger a zzor lol. Yar zzor bbox ho a, halae ar mel zza seir. <sup>15</sup> Giedae yar yoxl ssu ne ggux ssi a; Bo'asi capor mel leil miardal a bbeix: “Nia yar leil ssu cir bo cir bo mel dax lei ggux lol nia, yar leil bbeix no nr ddo. <sup>16</sup> Nia lei leixrmopeixl gga ar mel vei teixl lei a, middur ddei leil dol dae a, yar leil ggux lol nia, yar leil hie nr ddo.”

<sup>17</sup> Luxldaexr mel ggux doxr dae a mercixl ggux ci a, yar ggux si lei ssu ne mel ddaexr teixl lei a, yel ceili zi sael zza. <sup>18</sup> Yar ddaexr teixl lei ssu mel ake vei xixl a yar yoxrmo leil i lol, yoxl zzor labox zaxr dae mel yar yoxrmo leil zol. <sup>19</sup> Yel yar yoxrmo yar leil biex a bbeix: “Ni eilni arddolmaex ssu ne ggux? Ni arseir hhexr mi gga ggux a? Yihexrhuaxr ni leil perniar su ca hal ddei leil seir lol nia.”

Luxldaexr yar yoxrmo leil arddolmaex ggux bbeix gger a bbeix: “Eilni ngo Bo'asi ddei mi gga ggux.”

<sup>20</sup> Yel yar yoxrmo bbeix: “Yihexrhuaxr Bo'asi leil seir lol nia. Arbosobo mel gol dae seir ca mel leil nei si ho ca mel leil perniar.” Yar yoxl bbeix: “Bo'asi mel niul cirssor ggur seir, yar niul leil guaxr mibbe,” eine bbeix.

<sup>21</sup> Nael Luxldaexr bbeix: “Yar ngo leil bbeix, ngo leil yar ddei wormusu ssormaer mel dax ggux mae dae ddo, loxlmoxr maelmaerjgia caer jjia zzezze ggux ci,” eine bbeix a.

<sup>22</sup> Yel Naxr'exrmir yar cirmu leil bbeix: “Nga a. Allor, ni yar ddei wormusu ssormaer mel dax ggux mae dae lalssa, si mi gga ggux ssi a mel, si ni leil ci leilei.” <sup>23</sup> Luxldaexr dder Bo'asi ddei wormusu ssormaer mel dax ggux mae dae a, ssu caer jjia nei so caer jjia zzezze ggux ci a. Luxldaexr halae yar yoxrmo dax cirgo a goxr dae seir.

### Naxr'exrmir Luxldaexr Leil Capor Zo Gger

**3** <sup>1</sup> Eine ar ni a, Naxr'exrmir Luxldaexr leil bbeix: “Allor, ngo ni leil zeixleixr capor ar ddei zo box gger nia, yel ni leil zabbar goxr

seir ake ar ddei zza lol nia. <sup>2</sup> Bo'asi mel niul cirssor a. Ni yar ddei wormusu ssormaer mel dax ssu ne ggux mae goxr a. Ni noni dae la, eilmei Bo'asi ggieddei gga ssu o dae. <sup>3</sup> Ni ggecir arleixr cir, nerxiu-xiu ardoxr mei, pia zae zzir xiux veixr dae a ggieddei gga ssi. Yar zzor teixl ho, dda teixl ho a yixr dae a saelnei ni halmaex hher dae yar leil saexl lol ddo. <sup>4</sup> Yar arddolmaex yixr bbe i dae, yel ni gger a yar qihher leil jiu dae ddei maxrleixl gger, yar qihher ddei dax halmaex yixr dae. Ni arsae bei nia mel yar dder ni leil bbeix gger var.”

<sup>5</sup> Yel Luxldaexr yar leil bbeix: “Ni arsae bbeix mel, ngo arsae bei.”

<sup>6</sup> Luxldaexr dder ggieddei gga ssi a, yar yoxrmo yar leil arsae miardal arsae bei a. <sup>7</sup> Bo'asi zzor bbox dda bbox ho a ssu bexl yarqir dax sosarsar arla yixr dae a. Yel Luxldaexr arjjiuljjiu arla gger a yar jiu dae lorbbor zul maxrleixl gger a, yar qihher ddei dax yixr dae a. <sup>8</sup> Nael merxixl-soxiu sael loxr a Bo'asi zucur a. Yar yixr piarpox xixl lei a, xiar lei xiar nr ci, yar qihher ddei dax ssormaer ar ddei yixr dae.

<sup>9</sup> Yar dder biex a bbeix: “Ni arseir a?” Ssormaer hal ddei ddarkoxl a bbeix: “Ngo ni leil visser su Luxldaexr a.<sup>c</sup> Ni ddei pia giexrluxl ddei ngo leil ardoxr jiu gger la.<sup>d</sup> Ni mel ngo ddei cirssor a, ngo leil guaxr mibbe su ca a.”

<sup>10</sup> Nael Bo'asi bbeix: “Allor, Yihexrhuaxr ni leil seir lol nia. Ni sol su bbeixsael be su caleixlssor mel leil zo a ni capor bei lol cexr seir, nael ni yaa leil nr zo ssi. Ni eilleix ni yoxrmo leil bir halleix leil lei perniar. <sup>11</sup> Allor, ni zoxrzixr nr ssa. Niul kax gga ca mel arseir lei saexl, ni yarzi gayo, yarzi xiar saexl. Ni ngo leil eine bei nia bbeix goxr a mel, ngo arsae bei lei ni leil bei gger ssi leilei. <sup>12</sup> Nga a. Ngo mel ni ddei cirssor a, ni leil guaxr mibbe, naelca ar ddei zza. Yar mel ni dax bir ngo leil lei ga, yar bir ngo leil ni leil guaxr mibbe.

---

<sup>c</sup>3:9 Ngo ni leil visser su Luxldaexr a. Ddar eil qir ddei yils mel dder bbeix Luxldaexr Bo'asi ake gga yar leil visser su ca yarzi nr nga bbeixarnar, nael yar eine bbeix a mel Bo'asi leil saexl lol niazzir, yar Bo'asi ddei ddar no yuex.

<sup>d</sup>3:9 Ni ddei pia giexrluxl ddei ngo leil ardoxr jiu gger la, Luxldaexr ddei yils mel dder bbeix Bo'asi yar leil bbeix mibbe.

<sup>13</sup> Eilmei nael ni dder eilmaex yixr dae ddo a. Arggenehe niul yar ni leil guaxr guaxr bbe i. Yar ni leil guaxr arddeirnga a, seir a. Nael yar ni leil nr guaxr arddeirnga a, ngo arddolcar ci a lei gol dae Yi-hexrhuaxr meixsaer qir leil bbeix, ngo ni leil guaxr. Eilcar ni eilmaex yixr dae a, merteir yixr ci a dder ddo a.”

<sup>14</sup> Luxldaexr dder Bo'asi qihher ddei dax yixr dae a. Nael Bo'asi bbeix: “Ggieddei gga ssormaer lei goxr a si leil saexl lol nr ddo.” Yel mer-nr-teir seir, ca lei zzicarzzi leil i teixl lei nr ddo seir, Luxldaexr dder ha du lei a. <sup>15</sup> Bo'asi yoxl bbeix: “Ni teixlsi wol dae mae co lixr teixl la a ddor dae.” Yar dder eine bei a, Bo'asi yar leil ssu socei zi sael ar zzu dox ji gger, yar leil caer yiexl ho a, yar dder zzi gga ddir jjixr a.

<sup>16</sup> Yar ake jjixr ci a, yar yoxrmo yar leil biex a bbeix: “Allor arsaesael nga?” Yar Bo'asi yar leil arsaer lerler bei gger a maelmaerjia lei yar yoxrmo leil biar gger a <sup>17</sup> bbeix: “Bo'asi bbeix: ‘ngo leixrhher ddei xia dae a ni dax jjixr lei nr ddo’ bbaexl, yar ngo leil ssu socei zi sael ar zzu gger a.”

<sup>18</sup> Yar yoxrmo bbeix: “Allor, ni zoxrzixr nr ssa, xia dae a eil ddei arsaesael nga bbe i. Bo'asi eilni eil ddei bei nr har a mel, yar wornol nr var.”

### Luxldaexr Bo'asi Maerssor Bei

**4** <sup>1</sup> Bo'asi kax gga gielmi ddei dax azo lerler zzibbe ggie<sup>e</sup> ssi a halmaex cux dae. Nael yar bbeix dae bir yar leil guaxr mibbe su ca hal ddei halmaex malmal gger lei a. Yar ca hal ddei leil mi ddei ae dae a bbeix: “Ni eilmaex gger lei a, ni eilmaex cux dae.” Yel ca hal ddei dder cux dae a. <sup>2</sup> Bo'asi yoxl kax gga azo lerler guaxr su arbomar ceimo qie si lei. Yel yar yaa leil bbeix: “Nia eilmaex gger lei a, cux dae,” eine bbeix a. Yel yaa lei a cux dae a. <sup>3</sup> Bo'asi ca hal ddei leil bbeix: “Naxr'exrmir Moxrya mermi jjixr lei a. Yar niul cirssor Yirlixlmirlexl ddei mi fel vur. <sup>4</sup> Ngo ca eil zzu nei arbomar eil ceimo meixsaer qir leil ni leil bbeix gger nia, ni mi eil fel vae mibbe. Ni vae

<sup>e</sup>4:1 kax gga gielmi ddei dax azo lerler zzibbe ggie Eilmaex mel azo lerler zzibbe ggie halae Boxrlxlhexr ca mel azo lerler vur, azo lerler vae ggie.

arddeirnga a nael, ni dder vae, nr vae arddeirnga a nael, ni ngo leil bbeix gger la. Ni bir ngo leil vae mibbe, ni nr vae a saelnei ngo vae cexr.”

Yel ca hal ddei bbeix: “Ngo vae nia.”

<sup>5</sup> Bo'asi yoxl bbeix: “Ni Naxr'exr mir dax mi fel vae hal cir ni mel, si ho ca hal ddei ddei<sup>f</sup> maerssor Moxrya su Luxldaexr leil lei ni maerssor bei lol nia. Eine nga a saelnei ca mel Luxldaexr ddei capor si ho hal ddei leil holcir dae var. Yar ddei mi fel lei yar ddei nga doxr dae var.”

<sup>6</sup> Yel ca hal ddei bbeix: “Eine nga a, ngo nr vae, ngo vae arddeirnga a lei, arddolcar ngo aniuX mel mi eil fel li wo nr ddo.<sup>9</sup> Ni vae ddo a; ngo vae mibbe maelmaerjgia lei ni vae ddo a.”

<sup>7</sup> Halleix, Yirsaexllixl su ca mel azo lerler vae nei vur eine zzubbe a mel, vae mibbe su ca ddei nr vae arddeirnga a, qixnex ar bbor lixr teixl lei a kebal vae mibbe su ca ddei leil gger nia. Eine mel dder zzi dax zzubbe hoxr ho a.

<sup>8</sup> Ca hal ddei Bo'asi leil bbeix: “Ni vae ddo a,” eine bbeix a. Yel qixnex bbor lixr teixl lei a Bo'asi leil gger a. <sup>9</sup> Bo'asi dder ca maelmaerjgia leil bbeix: “Nia noni dae la. Eilni nia cirddei-hanga lei mia, cirddei-hanga lei bbejjiur, ngo Naxr'exr mir dax Yirlixl mirlexl ddei nei yar ssor Marluixr nei Zilir ddei cirza-hanga lei vae si lei ho a.

<sup>10</sup> Marluixr ddei maerssor Moxrya mermi su Luxldaexr lei ngo ddei maerssor nga a. Eine nga a mel Luxldaexr ssor xiu beil ddei mel Marluixr ddei cirza-hanga lei li wo ddo, halae yar ddei mi sser, yel yar kax gga ca mel nei yar ake ca mel lei yar leil holcir dae var. Eilni nia lei mia a; nia lei bbejjiur a.”

<sup>11</sup> Kax gga gielmi dax hher dae ca maelmaerjgia lei bbeix: “Ngua mia a; ngua bbejjiur a. Arbosobo Yihexrhuaxr leil ssormaer eil ddox

---

<sup>f</sup>4:5 si ho ca hal ddei ddei Si ho ca ddei mel dder Marluixr.

<sup>9</sup>4:6 Eine nga a ngo nr vae, arddolcar mel mi eil fel halae ngo aniuX li wo nr ddo Ddar eil qir ddei yilsi mel dder bbeix, bir dae a bbeix, mi vae su ca eil ddei mel aniuX zza ho a. Yel yar yoxl Luxldaexr leil yar maerssor bei lol nia. Yel mi eil fel yar ddei aniuX mel paxr wo nr ddo. Mi eil fel mel Luxldaexr dax xiu beil aniuX ddei leil gger nia.



leil ni leil aniuX cirke xiu gger lol nia, hherdder Lajixr nei Lilyal<sup>h</sup> yaa ddei capor Yirsaexllixl leil aniuX xiu gger mel sael a ar ke xiu gger lol nia. Arbosobo ni leil Yirfarta hhexr gga be lol nia, Boxrlxlhexr kax gga middux lol nia. <sup>12</sup> Ssormaer hal ddox ni leil ssormine hier gger a, ni ddei ake mel Yoxrdaxl<sup>i</sup> nei Tamar ddei ssor Farlexlsi ddei ake sael a nga lol nia,” eine bbeix a.

<sup>13</sup> Bo'asi mel Luxldaexr leil bbeix si lei a yar maerssor bei lol a. Yihexrhuaxr Luxldaexr leil ggecirniar lol a, yar ssor ar ddox xiu wo a. <sup>14</sup> Yel ssormaer mel Naxr'exrmir leil bbeix: “Yihexrhuaxr eilni ni leil guaxr su ca ar ddox gger a. Ni yar leil bbeix zae gger nia. AniuX eil ddox leil Yirsaexllixl gga middux lol nia. <sup>15</sup> Ni ni leil eine perniar cirmu ar ddei zza a mel bir ssor sirlar zza leil lei seir. Eilboxl yar halae ni leil lilbol ar ddox xiu gger a, lilbol eil ddox mel arddolcar ni leil ba nia, yar ni leil goxr seir lol nia.” <sup>16</sup> Naxr'exrmir aniuX ddox leil deix gel leil a, aniuX ddox leil hier dae a.

<sup>17</sup> Yel yaa dax su ssormaer mel aniuX ddox leil Exrbeixldaexr mi gger a. Yaa halae bbeix: “Naxr'exrmir ssor zza,” eine bbeix a. Exrbeixldaexr mel Yixi yarbbor a; Yixi mel Daxlweixl yarbbor a.

### Zzirmar Daxlweixl Ddei Porpor

<sup>18</sup> Farlexlsi ddei ssormine mel cir zeix cir zeix eine xi zeil arddeir a:

Farlexlsi Xisiluixr leil xiu;

<sup>19</sup> Xisiluixr nael Lar leil xiu; Lar nael Yalmirnaxrdaxr leil xiu;

<sup>20</sup> Yalmirnaxrdaxr nael Naxrsuixl leil xiu; Naxrsuixl nael Sarmer leil xiu;

<sup>21</sup> Sarmer nael Bo'asi leil xiu; Bo'asi nael Exrbeixldaexr leil xiu;

---

<sup>h</sup>4:11 Lajixr nei Lilyal Lajixr nei Lilyal ddei ssor mel dder Yirsaexllixl ca ddei porpor loxr a. Yirsaexllixl goxrjia mi ddei mel dder Yirsaexllixl ca mi eil ddei dax mi si lei arddeir a.

<sup>i</sup>4:12 Yoxrdaxl Yoxrdaxl mel Yirsaexllixl ddei ssor mel gga yarzi zoxlyoxl ca ddei nga a. Yar ddei giedae ca yarzi miur. Yar ddei giedae ca cirmelmel a ca middux, cirmelmel a zzirmar loxr a.

<sup>22</sup> Exrbeixldaexr nael Yixi leil xiu; Yixi nael Daxlweixl leil xiu.